


YO ONDIMI YANGO?

 Pe liboso tóbondela, nalingi koloba boye, ete lobi na mpokwa, nakanisi ezalaki lobi, nalobaki na mwasi moko: “Soki okosála bobele ndenge tozui mitindo ya kosala, eko. . . bebé oyo azali na bokono ya motó-kovimba, yango ekokónnda.” Pe motó ya bebé yango ekóndaki, lobi na mpokwa, ndámbo ya centimetre moko elongwaki na ntáká ya nsinga. Na bongo, mwasi yango ayei na ye sikawa.

² Sikawa, ntina nasalaki bongo, ndeko mwasi, ezali na ntina moko. Bomoni? Soki omoni likambo moko ya polélé mpenza kosálema, yango ekólisaka kondima ya moto mpo ákoba kondima yango. Mbala mosusu nasáláka bongo mpo na, ntango mosusu, ndakisa kosenga moto yango kotéléma, kotiá litambe moko to matambe mibale liboso, koningisa loboko, kosémbola mosapi, eloko moko bakoki kosala ndenge mosusu, bobele mpo báyebe ete nyonso wana ekómi malamú. Bakómaka na motema likolo pe bakanisaka ete ekosalema te, kasi esalemaka ntango nyonso. Bomoni? Esengeli mpenza.

³ Bato boni balingi ete tókanisa bango na libondeli, sikawa? Bótombola bobele maboko pe bóloba: “Nkolo, kokisa yango?” Tógumba mitó.

⁴ Nkolo, wana tozali koyoka loyembo monene ya kala ya lingomba oyo, ekomámá na moninga na ngai ya motuya, Paul Rader: “Ndima kaka,” tozali kokanisa sikawa mwana mobali moko, tata na ye amemaki ye na bayekoli, bobele mikolo zomi sima na Yesu kopesa bango nguya ya kobengana milimo mabe pe kobikisa babeli, pe awa, maladi ya ndeke elongaki mpenza bango. Pe bamonaki Nkolo na biso koya. Pe tata na ye ayáki mbángu pe alobaki: “Nkolo, yokela biso mawa. Mwana na ngai ya mobali atungisamaka mingi na molimo mabe. Namemaki ye na bayekoli na Yo kasi bakokaki kobikisa ye te.”

⁵ Yesu alobaki: “Nakoki, soki ondimi. Ndima kaka.” E Nzambe, Obongwani ata moke te, kobanda wana: Ozali Nzambe yango moko ya bolingo, boboto, pe mawa. Ndenge Ozalaki na eleko wana, Ozali ndenge moko lelo. Pe Nkolo, lokola tata wana, biso nyonso tobéléli: “Nkolo, Sunga kozanga kondima na biso.” Ezali na komikitisa mingi, biso nde tobétaka libaku na yango, Tata.

⁶ Tolingi kopesa Yo matondi pe masanzoli ndenge osimbaki bebé moke yango lobi na mpokwa, komona ete mokuwa ya motó wana, oyo evimbaki, ezali, ete mokuwa yango ekómaki monene, ekitaki na ndambo na centimetre moko lobi na mpokwa. Tozongisi matondi mpo na yango, Tata. Ntango toyebi ete minganga na biso bazangi eyano na boluki-luki na bango mpo

na yango, bakoki kosala eloko moko te mpo na yango; kasi Yo ozali sé Nzambe, Nkolo na makambo nyonso. Totondi Yo, Tata. Totondi Yo mpo na bosémbó ya mama oyo, pe bopolo, pe botosi, ya kozonga ná nsinga yango pe kokangisa yango na eteni ya lokasa oyo, awa, mpo na kolakisa na bato nyonso litatoli na ye mpo na nkembo ya Nzambe. Tika ete mwana na ye ázala na bomoi pe ázala mwana lokola bana nyonso, mpo na nkembo na Yo.

⁷ Tálá maboko nyonso oyo etombwami, Tata. Loboko moko na moko ezali na bosenga. Oyo ya ngai pe, Tata, nazali na bosenga. Pe bosenga mingi ezali awa, na lolenge ya mikanda to, kati na engóngólo oyo, bato na bosenga, baoyo bazali mpenza na bosenga. Tika ete ésalema, Nkolo, ete moko na moko ázua kokokana na bosenga na ye na mpokwa oyo. Tika ete bázua litatoli ya mama oyo, lokola ndakisa, mpo na kotalisa ete ntango Olobi likambo, esili nye. Ezali . . . Yo . . . Nyonso tosengeli kosala ezali koyamba yango pe kolóngobana na yango. Ezali mosala oyo esili kosila.

⁸ Sálá, Nkolo, ete moko na moko na mikanda oyo pe miswále oyo, bato oyo yango ekotiana likolo na bango, tika ete bábika. Bato nyonso oyo batómbolaki maboko, Tata, tika été bázua kokokana na mposa ya mitema na bango. Tosengi yango na Nkombo na Yesu. Amen. Bokoki kofanda.

⁹ Nalingaki kolakisa bino nsinga oyo mwasi yango (Yango oyo. Um-hum.) . . . motó ya bebé moke yango ekóndaki mpenza, ndenge Nkolo alakaki biso na nzela ya Molimo Mosantu, lobi na mpokwa. Azali malamú mingi, boye te? Na bongo, epesaka biso mpiko mingi ya kozala na kondima pe kondima.

¹⁰ Sikawa, ntango Yesu alobaki na nzete wana, na Malako 11:23: “Moto moko te akolia mbuma na yo kobanda lelo,” ntango mosusu Agángaki te. Ee, na bosémbó mpenza, Alobaki yango na malembe nyonso, kino bayekoli na Ye . . . nakanisi été moko na bango nde ayokaki Ye. Pe yango . . . Ntango maladi ya ndeke wana, ntango esalemaki liboso na Nkolo Yesu, ebwakaki mwana mobali yango na makasi koleka liboso; ntango mosusu, akweyaki na nse lokola akufaki, kasi asósólaki ete akutanaki na Moto moko Oyo azalaki na kondima ya likolo koleka bantómá yango.

¹¹ Sikawa, nalingi ete, moto oyo andimaka lobiko na nzoto ya bo-Nzambe te, átala likambo oyo malamú. Yesu asilaki kopesa bango nguya ya kobengana milimo, kasi bazángaki kosala yango. Ezali te ete nguya ezángaki kosala, kasi bango nde bazángaki kosala yango. Yesu ayebisaki bango:

“Mpo na nini tokokaki kobengana ye te?”

Alobaki: “Mpo na kozanga kondima na bino.”

¹² Lingomba ezali naino na nguya. Nzambe alongólá naino nguya na Ye na lingomba te, kasi lingomba nde ezangi kondima esengeli mpo na kosala yengebene na yango. Esili. Ezali mpenza

pete. Tolukaka kobulunganisa yango mpenza mbala mosusu, kasi koleka bokokómisa Nsango malamumu likambo na pete, koleka pe bokomóna été ezali likambo ya solo, ntango bokokóma na kosokéma mpenza ná yango: Nzambe alobaki bongo; ekati likambo; pe esili nye. Ndima bobele yango pe kende liboso.

¹³ Ntango Yesu alobaki: “Moto moko te ália mbuma na yo,” ee, nkasa ezalaki bobele kitoko pe mobésu ndenge ezalaka. Mposa ezalaki ndenge moko, kasi kuna, na nse ya mabelé, na misisa yango, bomoi ebandaki kokende.

¹⁴ Ezalaka pe bongo mpo na bokono ya cancer, mpo na bokono ya lolenge nyonso oyo-oyo bokoki kokanisa. Soki okoki kondima Liloba na Nzambe, kuna na nse, na misisa na yango, cancer ekoki kozala kuna; loboko na yo ekoki kozala ya kokangama. Yango etali lobiko na nzoto ya bo-Nzambe te. Ezali: “Soki okoki kondima.” Bomoni? Kuna na nse, esika moko, esili kobanda kosala mosala.

¹⁵ Yesu alobaki: “Soki olobi na ngomba oyo: ‘Longwá wáná,’ pe otii ntembe na motema na yo te, kasi ondimi été likambo olobaki ekosalema, okoki kozua likambo olobaki.” Ezali kitoko, boye te? Yango euti na nani? Mwana na Nzambe, Maloba na Ye . . . Likolo ná nse ekoleka, kasi sikawa . . . kasi Maloba na Ye ekoleka te.

¹⁶ Sikawa, lolenge se moko oyo okoki kosala yango, osengeli kozala na ntina malamumu pe mposa malamumu. Sikawa, soki nayei awa pe nalobi: “Nakolakisa bino ete nakoki kolongola ngomba oyo: ‘Ngomba, longwá wáná.’” Ekolongwa ata moke te. Soki moke te. Ata nazalaki na eloko nini. Esengeli kozala . . . Liboso, osengeli koluka mokano ya Nzambe.

¹⁷ Yango wana, na momesano, na milongo ya mabondeli, na—nazalaka na likambo ya matátá koleka, ezali mpo likambo moko esilá kosálema na milongo pe bongo na bongo, kuna nde esika esalemaka lisusu. Kasi bomoni, soki ozali na lisumu oyo eyámbólami te. . . Bosilá komona likambo yango, liboso na ngai kobengana molimo mabe? Natálaka likambo yango malamumu mpenza mpo na kondimisama solo ete ezali na likambo moko te na bomoi yango, oyo ekoki kopekisa likambo kosalema, bomoni, mpo, bómikanisela, okoki kozua mindondo mpo na oyo etali makabo oyo.

¹⁸ Bómikanisela, na eleko moko Nzambe apesaki mosakoli . . . akómisaki moto moko mosakoli, Mose, pe ayebisaki ye ete ákende koloba na libanga. Pe mosakoli yango amemamaki na nkándá, akendeke, pe abétaki libanga yango, kotalisa bolembu ya Klisto, ete Asengelaki kokufa mbala ya mibale to kobétama mbala ya mibale. Azalaki na nguya ya kobimisa yango, kasi ezalaki mokano ya Nzambe te.

¹⁹ Nakoki kondima te ete ezalaki mokano ya Nzambe mpo na Eliya kokende kuna, mpo bana yango bazalaki kotúmola ye mpo azalaki na libandi, nandimi te ete asengelaki kosala likambo

yango. Kasi azalaki mosakoli, asilikaki, pe alakelaki bana yango mabe, pe ngombolo mibale ya basi ebomaki bana mike yango ntuku minei na mibale. Bomoni? Kasi nandimi te ete asengelaki kosala likambo yango. Pe yango nde—nde . . . biso . . .

²⁰ Nandimaka été, lelo, liboso Nzambe Ápesa lingomba na Ye nguya, Amekaka lingomba na Ye mpo na komona likambo nini ekosala.

²¹ Biso . . . mbala ya sima, ntango mosusu, soki Nkolo alingi, ntango nakozonga, tokozua ntango ya kolobela likambo ya ndenge wana na bolai, likambo oyo elingi kosalema, boye, na ntango wana tokoyeba likambo yango malamumu koleka.

²² Kasi soki okoki koloba liloba moko, lobá: “Nkolo, nandimi yango,” kotia ntembe te, lobá yango mpenza na motema na yo . . .

²³ Sikawa, tóloba ndakisa, nazalaki na lobwaku, pe nazali te . . . nazali koteya na bato milió na milió, kasi kuna, na ngámbo mosusu ya ngomba, ezali na etónga moko ya bato nkámá, baoyo bazali kokufa zángá koyeba Klisto. Ee, nazali koteya na milió na bato, kasi ata bongo, Eloko moko na motema na ngai ezali koyebisa ngai: “Kende na ngámbo epai ya bato wana. Kende epai na bango. Bazali kokufa.” Nazali na mposa ya kokende ngai moko te, kasi ata bongo ezali na Eloko moko kati na ngai. Bomoni, na ntango wana, ezali Nzambe moto azali kosala. Tala ntina nini ozali kolanda, tala mposa nini ezali kotinda yo kokende, ezali mpo na yo moko te . . . Sikawa, soki nalobi: “Ee . . .” Soki ntina na ngai ya kokóma kuna ezali malamumu, kasi, ntango nakómi awa, namoni ngómbo moko ya monene, nalobi: “Boyebi, soki naleki likolo na ngómbo wana pe nabikisi mokama na bato nyonso wana, mokolo moko bakosala ekeko moko kuna: Ndeko Branham, missionary monene.” Sikawa, mposa na ngai ezali malamumu te. Ngómbo yango ekokweya te. Te, misie.

²⁴ Kasi soki mposa pe ntina na ngai ezali malamumu, pe Nzambe, na motema na ngai, azali kokamba ngai, pe nazangi makoki ya koleka likolo ya ngómbo yango, zonga-zonga na ngómbo, na nse ya ngómbo, nakoloba: “Ngómbo, longwá.” Ntango mosusu eko . . . Ntango nalobi bongo, pe nalobi yango na eloko mosusu te kasi na molimo moko ya sembo, na kokambama ya Molimo Mosantu, kati na mokano ya Nzambe, ntango mosusu ata lútu moke ya mabelé ya ngómbo yango ekolongwa te, kasi ezali na nzela. Mokolo elandi, ntango mosusu kilo moko ekokwea. Mokolo elandi, kilo nkama mibale na ntuku mitano. Pe ntango mosusu sima na sanza moko, kilo nkoto mitano ekokwea. Ezali nini? Ntango mosusu ekoki komonana ata moke te, kasi ezali kolongwa, ezali na nzela. Nakozala se wana mpo na komona likambo yango kosalema, mpo Nzambe moto alobaki bongo, pe likambo esili.

²⁵ Okoki kokanisa yango mpo na mama na yo kuna, na mpokwa oyo? Malamumu, soki okanisa yango, akoyóka malamumu. Malamumu.

Ezali soki ondimi yango: loba se liloba pe kangámá na yango. Bomoni? Ndima yango; tingámá na yango. Ezali Bomoï na Seko.

²⁶ Sikawa, lobi sima ya nzanga...Nayebisaki Billy, na mpokwa oyo, ete ákabola ba-kalati ya mabondeli te, mpo nalingaki koloba. Nazali koloba solo mpenza, ete kobanda sanza ya liboso, nazali kokende na mikili mosusu, pe kozonga, na Phoenix, koya na ndako, pe kozonga, pe nyonso wana mpenza (kososola makanisi yango) kino, mbala mosusu, nazali koyeba mpenza te esika nazali. Ezali mpenza kolembisa ngai mingi.

²⁷ Na bongo, nasengeli kokende, pe bango...bino—bino, bandeko, bosengaki ngai ete nátikala awa mwa mikolo mosusu. Nasepeli na yango mingi. Namoni mpenza ete oyo ezali etóngá ya batei ya malamú mingi awa. Elingaki kozala malamú ete tókoka kozala na ntango moke koleka mpo na boyokani-na-bondeko. Soki Nkolo alingi, nakozóngá mokolo mosusu. Ekozala eloko mosusu te, bobele kokende longwa na losambo moko kino na mosusu pe kotambola na engumba mobimba mpo na kotala bino nyonso. Nakosepela kosala yango: nyonso nakoki kosala mpo na kosunga Bokonzi na Nzambe, ezali yango, soki bokolinga ete násala yango. Pe kozonga mokolo mosusu mpo na kosangana ná bise pe kosala liyangani moko ya kitoko pe malamú esika moko.

²⁸ Pe bómikanisela, bandeko, ete nakobondela mpo na bino. Ezali likambo nakosála mpenza. Pe nalingi ete bino nyonso bóbondela mpo na ngai, bino nyonso.

²⁹ Pe sikawa na—nazali. . .lobi na ntongo, mayangani ekozala na ba-losambo kitoko nyonso ya engumba oyo.

³⁰ Sikawa, bato mosusu ya Jeffersonville bazali awa. Banninga na ngai mosusu, moko na bayangeli misolo ya losambo azali awa, Ndeko Fred Sothmann. Nazuaki naino makoki ya komona ye te, na liyangani. Pe ndeko. . .Oh, banninga na ngai mingi mosusu, bauti kuna na Jeffersonville, ya ngai. . .secrétaire na ngai kuna ná—ná baoyo nyonso bazali awa, esika moko kati na liyangani. Namonaki bango naino te.

³¹ Pe bandeko, ezali na ba-losambo kitoko awa na engumba oyo. Ná bino bapaya mosusu nyonso botikali, bóluka moko na yango pe bókende na ba-losambo yango lobi. Nandimi sóló ete bokosepela. Bazali bandeko oyo bandimeli lolenge ya lotómo oyo. Yango wana bazali awa, bafandi na etumbelo pe awa na bisika oyo, mpo bandimelaka yango. Pe nasepelaka na bato yango.

³² Nkolo ápambola lisanga ya Bato ya mombongo ya Litóndi ya Nsango-malamú oyo, baoyo—baoyo babongisi mayangani oyo. Ezali. . .Nabanzi ezalaki bongo, baoyo babongisi mayangani oyo. Na—nakendeke mingi na bato baléngelaka yango, mpo kuna na kati. . .Tosengelaki kozala boye te, kasi mbala mingi, bandeko batikaka bokeseni ya mike-mike, lokola moto moko andimaka *eloko moko* ya moke, *eloko mosusu* ya moke Ebótaka

mwa mindondo moke pe etúmbolaka ba-mpóta ya kala, esengeli kokauka, kasi yango e—e . . . Pe soki, soki nakei elongo na Bato ya mombongo ya Litóndi ya Nsango-malamu, na ntango wana, esungaka moke mpo na kozipa yango, toanganaka, pe, elongo, tozalaka na boyokani-na-bondeko ya solo mpenza, ntango ya malamau mpenza. Pe tosepelaka na yango. Nzambe ápambola lisanga yango. Nandimi ete Nkolo atelemisaki yango na ntina.

³³ Sikawa . . . na sima, mokolo mosusu, nazuaki litomba ya komona esika ya Ndeko Oral Roberts. Pe oh! la la! esika monene mpenza, eloko moko ya kitoko mpenza. Ezali—ezali ekaniseli ya Pantekote.

³⁴ Na sima, nakendeki epai ya Ndeko Tommy Osborn, esika mosusu ya kitoko mpenza, moto malamau ya Nzambe, oyo . . . Ngai ná Ndeko Tommy tozali mpenza baninga, ná Ndeko Oral, bandeko ya motema mpenza, tolinganaka, pe tomekaka, na makasi nyonso, kosala nyonso tokoki kosala mpo na bolamu ya bato kati na Bokonzi ya Nzambe.

³⁵ Na bongo, nasepelaka mpenza na bato yango, bazalaka awa, na engumba oyo, kati na bato malamau mosusu oyo bozali na bango. Bino ba-mpate, bozali na babateli ya malamau mpenza. Nakoloba yango bobele bongo. Tika ete Nkolo ákoba kozala na bino nyonso, yango nde libondeli na ngai. Sikawa, lobi na sima na nzángá, ngai . . . Liyangani ebandaka na ngonga nini, bandeko? Na ngonga ya mibale na ndambo. Tóloba, na ngonga ya yambo—ya yambo to yambo na ndambo, bosengeli kozala awa, mpo bákátá liyangani na biso na misala mosusu te.

³⁶ Sikawa, soki bandeko bayebisi bino naino te, na mpokwa oyo, bazali na ndambo ya ba-búku, ba-fotó pe nyonso wana, ná ba-bánde, oyo basili kosala, ná . . . ya mayangani, pe batékaka yango. Kasi tokopésa bango nzela ya kotéka yango mokolo ya Sabátá te, lobi. Buku moko te pe eloko moko te ekotekama lobi. Na bongo, toko . . . topesaka yango nzela ata moke te. Ata bato mingi balobaka: “Ozali mpenza na libunga . . .”

³⁷ Pe mobange Papa Bosworth azaláká koloba na ngai: “Oh, Ndeko Branham, esika wana ozali na libunga,” kasi ezali bongo nde nakambami (Bomoni?), pe na—nakambami. Soki olingi kozua yango, bakopesa yo yango, kasi soki yo . . . Kasi tokoki koteka te, mokolo ya Sabátá. Te. Esili bongo. Soki nandimi yango, nasengeli kobikela yango, se . . . nasengeli kobikela yango ngai moko. Bomoni? Pe na—nasengeli kobikela makambo ngai nandimaka pe, na bongo . . . To bokoki kotinda yango na ndako, pe, kino na ndako, kino esika yango mpo na kozua yango.

³⁸ Sikawa, na mpokwa oyo, oh, biso nyonso tóbosana mpenza ete, oh, ete tozali na mosala moko ya kosala, to likambo nini mosusu, to minioko ya lelo. Tótia mpenza pembeni makambo nyonso, mpo tóyekola Liloba na ba-miníti moke oyo, pe tómona eloko nini Nzambe alingi koyebisa biso na nzela ya Liloba na

Ye. Pe tika ete nábondela mpo Nzambe ápesa biso lipamboli ya monene koleka na mpokwa oyo.

³⁹ Gene, okoki kolongolela ngai ye? Okoki kolongolela ngai mwana moke ya mwasi wana? Azali elenge kitoko, boye te? Okolinga kokende na ndako elongo na ngai mpo na kosakana ná elenge moke na ngai, Sara, azali molai pene na boye? Oh, olingi yango? Na—nakosepela bongo mpo na yo. Azali molai lokola yo, pe azali mwana mwasi ya Papa. Um-hum. Hum. Pe nandimisami ete yo—yo pe olingaka Papa na yo, boye te? Mama? Oh, ezali solo mpenza. Mwana mwasi moke ya kitoko koleka, nazali awa, kotalatala. Miso mike lokola mwa madusu mibale, etobolami na bolangíti, ná—ná suki ya mwa moindo.

⁴⁰ Nalingaka mpenza bana mike. Nazali na bana basi mibale ya mike na ndako. Moko na bango, nkombo na ye Rebeka, mosusu Sara.

⁴¹ Eleki ntango moke awa, nazalaki mosika. Bango mibale bazali bana basi ya Papa, boyebi, pe nalingaka bango. Pe bebele ntango nakotaka, nasengeli komema bango na mokongo, pe . . . bebele Becky abandi kokóma monene mingi mpo na yango; akómi monene lokola ngai. Akoki kobuka ngai mokongo sikawa; akómi . . . kasi, ata bongo, azali kaka mwana mwasi ya Papa. Na bongo, pene na mobu moko lisusu, tolingi kotinda ye na eteyelo ya Biblia, esika moko, mosika na eteyelo ya leta.

⁴² Na bongo, bazalaki kozela Papa, boyebi, ete ázonga na ndako. Nazalaki mosika na liyangani moko. Pe lobi na mpokwa bakozela ngai kino na minwí mpo náluka kokóta. Na bongo, nakómaki na ntongo-ntongo mpenza, na ba-ngonga ya misato to minei. Pe mama ayaki na ekuke pe akotisaki ngai, nalembaki mpenza mingi kino na . . . Awa na etumbelo, ngai. . . ntango e . . . na nse ya epakweli, ezalaka mpenza malamú, kasi soki etiki yo, esika wana nde makambo ebandaka. Bato boni basílí koyeba yango? Ee, ezalaka mpenza bongo.

⁴³ Bótala. Eliya amataki likolo na ngomba pe abéngisaki móto longwa na likolo, abengisaki mbula longwa na likolo, na sima, ntango Molimo etikaki ye, atelenganaki na bilíki mikolo ntuku minei pe Nzambe akutanaki na ye, wana amibombaki esika moko kati na lidusu.

⁴⁴ Yóna, azindaki pe azalaki na bomoi, na libumu ya mbisi monene, mikolo misato, butu na moi, basánzaki ye na libongo pe akendeki koteya. Engumba mobimba ebongolaki mitema pe bayaki epai na Nzambe. Pe ntango epakweli etikaki ye, amataki likolo na ngomba pe aséngaki na Nzambe ete ázua bomoi na ye. Bomoni?

⁴⁵ Nazalaki pembeni ya nkunda ya William Cowper, kala mingi te, moto oyo akomáki loyembo oyo toyembaka mingi na ntango ya elámbo:

Ezali na Liziba moko oyo etondi na Makila,
 Ekamatamaki na misisa ya Emanuele,
 Esika basumuki bazindisamaki na yango . . .

⁴⁶ Bosílá koyoka likambo nini ye . . . nini ekómelaki ye? Sima na mpéméla kotika ye, alukaki esika ya ebale mpo na komiboma.

⁴⁷ Nafandaka mpenza na ngámbo ya Kentucky Home ya kala. Pe Stephen Foster ayémbá ba-nzembo kitoko mingi oyo bato ya Amerika bayémbaka. Pe ntango azalaki kokoma, kozua mpéméla, mpéméla yango, kokoma loyembo moko, bongo abimaki na yango, akendeki kolángwa masanga. Suka-suka, abengisaki mosali moko, azuaki lotébu pe amibomaki.

⁴⁸ Bato bayebaka te makambo nini bato oyo babikaka na mosanda ya molimo balekaka na yango. Sikawa *awa*, ozali koyoka lokola okoki kolongola ngomba, kasi ntango epakweli etiki yo, pe obimi libanda na ekuke wana (soki moto moko azali kuna te mpo na kokanga yo, bomoni) na sima, ntango mosusu, sima na ba-ngonga moke, ekozala mpasi mpo na yo, okomituna esika nini ozali. Na sima, mpokwa na mpokwa, ekosengela na yo kosala makambo ya malamuru koleka.

⁴⁹ Pe mwa . . . Nalingi kolobela bino likambo ya bana na ngai Sara ná Rebeka. Na bongo, na ntongo elandaki, nazuaki mpongi te, pe nasilaki kolamuka, nafandaki na kiti, pe sima na ntango moke Becky, ye nde mokólo, azalaki—azalaki na makolo milai koleka Sara, na bongo, Becky ayaki mbangu . . . alamukaki, akitaki mbangu na mbéto, alamusaki leki na ye ya mwasi te, pe akimaki na lombangu nyonso mpenza kati na ndako. Azalaki koloba: “Papa, Papa . . .” Nasémbolaki moko na makolo na ngai, apumbwelaki yango, pe akweyaki te. Ezali lokola li—lingomba ya mikolo oyo, boyebi, esili kosala makambo mingi na ntango molai, boyebi, na mibu nkama na nkama. Akokaki koningana-ningana malamuru mpenza, azingaki ngai na maboko na ye pe alobaki: “Oh, Papa na ngai, Papa na ngai . . .”

⁵⁰ Pe Sara moke, na makelele wana, alamukaki. Ee, nayebi te soki bana na bino basalaka yango te; baoyo ya ngai basalaka yango: Lekwi azuaka bilamba oyo yaya atiki. Na bongo, Sara alataki pijama ya Becky, makolo na yango elekaki molai boye, boyebi. Pe azalaki koya, na mokuse na ye, azalaki kokweya, kobeta mabaku. Pe akómaki wana, moke sima na ntango. Na bongo, Becky abalukaki pe alobaki: “Sara, ndeko na ngai, nalingi koyebisa yo likambo moko.” Ye alobaki: “Ngai nakómaki awa liboso. Pe ezali litomba na ngai. Na bongo, ngai nazui Papa mobimba pe eloko moko te etikali mpo na yo.”

⁵¹ Ndenge wana nde bato mosusu bamonaka mpo na likambo ya losambo, boye te? Ah-ha. Ezali solo.

⁵² Pe Sara moke, akitisaki mbebo na ye, pe atómbólaki miso na ye ya moindo epai na ngai, pe abandaki kolela. Pe Becky atiaki litáma na ye na oyo ya ngai, azalaki kokanga ngai makasi.

Nalingaka ye. Pe Sara abandaki kokende na ye mpo Becky azuaki Papa mobimba. Nasémbolaki libólongo mosusu *boye* pe naminiolisaki *boye* mpo na ye. Oh, azuaki mpiko mbala moko pe apotaki mbangu, apumbwaki na libólongo na ngai na . . . Azalaki wana ntango molai te pe makolo na ye ezalaki ata kokóma na nsé te. Azalaki kotenga-tenga mwa moke (ntango mosusu, ndenge nazali, kotenga-tenga mwa moke, boyebi), pe azalaki . . . akokaki kokóma na nsé te. Azalaki ebongiseli ya monene te, boyebi, na bongo, akokaki kokita na mabelé ya makasi te. Azalaki wana ntango molai mpenza te.

⁵³ Na bongo, azalaki lokola kotenga-tenga mwa moke, pe natiaki maboko na ngai mibale zonga-zonga na ye *boye*, nayambaki ye pe nabendaki ye pembeni na ngai, pe angengisaki mwa miso yango ya moindo, pe abongolaki miso ngámbo ya Rebeka. Alobaki: “Rebeka, ndeko na ngai,” a—alobaki, “ekoki kozala solo ete ozui Papa mobimba, kasi nalingi koyebisa yo likambo moko, Papa azui ngai mobimba.” Na bongo . . .

⁵⁴ Ezali . . . Na lolenge moko, Asili kozua ngai mobimba. Ntango mosusu nazali na mayele ya kelasi te mpo na koloba likolo na makambo minene, kasi nyonso ngai nayebi ezali ete Asili kozua ngai mobimba, na kotenga-tenga na ngai, kotika Ye kozinga ngai na maboko mibale, ekosala ete námiyoka malamú.

⁵⁵ Ee, tóbondela Ye lisusu mwa moke, liboso tófungola Liloba.

⁵⁶ Sikawa, Tata na Likolo, tososoli ete biso pe tozali lokola bana mike. Pe—pe Yo olingaka kozala elongo na biso, pe kokumbamela elongo na biso. Pe wana tozali kokumbamela Yo, Olingaka biso, Osimbaka biso na maboko na Yo, Okitisaka Molimo Mosantu na Yo, pe Osalaka ete biso tóyeba ete Ozali na bomoi pe Ozali Tata na biso, totondi Yo mpenza mingi. Sikawa, tika ete Molimo Mosanto éyela biso na mpokwa oyo. Lingá motema moko na moko, Nkolo. Pesa biso lipamboli ya sika. Sopélá biso matangá ya mamwe ya mawa, Tata. Kotálá masumu na biso te. Ezali mingi koleka. Nkolo, limbisa yango. Bósáná yango, Tata, pe memá biso na maboko na Yo, pe—pe bikisa bokono na biso, pe—pe pétola bomoto na biso ya kati, pe kangóla milimo na biso, Nkolo, mpo tókoka kokumbamela pe kosanzola Yo, kozala lokola bana mike oyo bazali kopota mbangu na ndako, koyeba ete Papa azali kosenzela likolo na biso. Sálá yango, Nkolo.

⁵⁷ Sikawa, moto moko te azali na makoki ya—ya kolimbola Liloba. Toyebi yango. Yoane amonaki Buku na loboko ya mobali na Ye oyo afandi na ngwende, pe ezalaki na moto moko te na likolo, to na mabelé, to na nsé ya mabelé, oyo azalaki na makoki ya kozua Buku yango mpo na kofungola yango, to kokangola bilembo. Pe Mwana-mpate oyo asilaki kobomama longwa kozalisama ya mokili amonanaki. Pe Ye azalaki na makoki. Pe Azuaki Buku yango, akangolaki bilembo, pe afungolaki Buku yango. E Mwana-mpate, yaka na mpokwa

oyo. Fungolela biso Buku yango, Tata, wana tozali kotalela Yo, mpo tosenji yango na Nkombo na Yesu, Mwana-mpate ya Nzambe. Amen.

⁵⁸ Na mpokwa oyo, nasili kopona eteni moke ya Makomi awa, ya maloba misato. Kasi nalingi liboso kotánga molongo moko to mibale na Santu Yoane, mokapo ya 11, kobanda na molongo ya 23.

Yesu alobaki na ye, Ndeko na yo ya mobali akosekwa.

Malata alobaki na ye, Nayebi . . . akosekwa na lisekwa na mokolo ya suka.

Yesu alobaki na ye, Ngai nazali lisekwa pe . . . bomoi: ye oyo akondimela ngai, ata akufi, akozonga na bomoi:

Pe moto nyonso oyo azali na bomoi pe andimeli ngai akokufa mokolo moko te. Yo ondimi yango?

Alobaki na ye, Iyo, Nkolo: nandimi ete yo ozali Klisto, Mwana na Nzambe, oyo asengelaki koya na mokili.

⁵⁹ Pe lokola motó ya liteya, nasepeli kosalela maloba misato oyo: *Yo Ondimi Yango?*

⁶⁰ Natángaki lisolo moko eleki ntango moke. Nakanisi ete ezali likambo oyo esalémá te. Pe pene na batei nyonso, nabanzi, basílá kotánga buku ya Dr. Ingraham ya—ya *Mwana-Mokonzi Ya Ndako Ya Dawidi*. Ezali buku moko kitoko. Ezali, nakanisi ete esálemaka lisusu te. Nakosepela ésalema lisusu, mpo nákoka kolakisa yango na bato.

⁶¹ Pe kati na yango, nazalaki kotánga likambo moko ya moke na ntina na Lazálo, na ntina na Yesu, ná Maria, ná Malata, oyo, bazalaki bandeko basi ya Lazálo. Pe kati na yango, nazalaki kotánga esika Yesu azalaki kofanda, nakanisi, elongo ná Malata ná Maria. Bango mibale bazalaki bilenge basi kitoko ya Baebele. Pe Lazálo azalaki koyekola to kotánga mpo na kokóma mokomeli na témpelo, mpo na kokoma maloba ya mibeko mpo na banganzambe.

⁶² Pe Yesu azalaki na boyokani makasi, koleka mingi ná Lazálo. Ntango totángaka na buku, été, ezali esika Ayaki mpenza na ndako na bango, Malata azalaki na mwa bolembu ya koyoka maloba na Ye, kasi azalaki kolengela bilei pe kobongisa mesa, kasi Maria afandaki na makolo na Ye. Pe Yesu alobaki ete Maria aponaki makambo ya malamau koleka.

⁶³ Na sima, bayebisaki biso ete Lazálo azalaki moto oyo amemaki Yesu na Yoane, na lisolo ya ba-buku ya Dr. Ingraham, pe . . . ya *Mwana-Mokonzi Ya Ndako Ya Dawidi*. Ata bongo, ekoki na yango kozala solo te, nayebi te, kasi ezali mpo na kotia moboko na likambo yango, kasi esengelaki kozala ete Azalaki kofanda elongo na bango.

64 Sikawa, tokoyekola likambo oyo mikolo ekoya, ezali nde, na mpóso eleki, ete Yesu alobaki, na Santu Yoane 5:19: “Ngai... Mwana akoki kosala likambo Ye moko te, kasi bobele yango emoni Ye Tata kosala: Mwana akosalaka yango lokola. Tata azali kosala mosala, Mwana pe azali kosala.” Bomoni? “Yango emoni Ye Tata kosala.”

65 Na bongo, mpo na kokómisa yango mpenza lisolo ya solo, esengelaki ete Tata, Nzambe, ayebisa Mwana na Ye, Yesu, koloba ete: “Moninga na Yo, Lazalo, akokufa, kasi ekozala mpo na bolamu, na bongo, Yo bima na ndako. Kende mosika, mpo bakosenga Yo ete Óbondela mpo na ye, to, óbikisa ye, pe—pe Nalingi te ete Ósala yango.” Soki bolandi lisolo yango malamumu, ndenge tozali kokóba, bokomóna yango komata moke-moke kino na bosolo ya likambo yango mpenza. Na bongo, zángá kokebisa bango to likambo nini, Yesu akendeki mosika na ndako, akendeki esika mosusu, pe azongaki te na mpokwa wana. Pe Akendeki na bingumba mosusu. Pe bobele ntango Yesu abimaki na ndako yango, na sima, mindondo ebandaki.

66 Pe ntango Yesu abimi na ndako na yo, mindondo ezali na nzela. Bómikanisela, ntango Abimi na ndako na yo, mindondo ezali na nzela. Ntango bokotisi makambo ya moziki ná makambo nyonso oyo ezali kosalema mpenza na mangomba na bino, lokola motuka monene mpenza ya Rickenbacker ya ba-cylindre zomi na motoba, pe botiki Yesu libanda na yango, ntango Yesu abimi na lingomba na bino, mindondo ezali na nzela. Iyo, misie, ntango Yesu abimi na ebongiseli, mpo batii Ye pembeni pe balobi: “Ee, sikawa, biso tondimaka te ete makambo oyo ekoki mpenza kozala solo,” pe bozui eloko mosusu, mindondo ezali na nzela. Bóbosana yango te.

67 Ekaniseli ngai lisolo moko ya Nkolo Yesu, ezuami na Buku ya Luka. Boyebi, ntango Azalaki naino mwana moke ya mibu pene na zomi na mibale, libota na Ye bamemaki Ye, lokola ezalaki momesano mobu na mobu, na ntékè ya Pantekote. Pe wana bazalaki na engumba ya Yelusaleme, na ntékè, pe bazalaki kolekisa ntango malamumu, tomoni na Biblia ete batambolaki mikolo misato kozanga Ye. Pe bakanisaki ntango mosusu ete, na bosolo mpenza, Yesu asengelaki kozala elongo na bandeko na bango mosusu. Sikawa, tokoki kosala bongo te. Suka-suka, ntango bakendeki koluka-luka epai ya bandeko na bango mosusu, Azalaki kuna te.

68 Pe tokoki koloba te na bosolo mpenza, été mpo tozali ba-Metodiste, Batiste, Presbiterien, Pantekotiste, pe ba-nkoko ná ba-tata na biso bazalaki bandimi minene, ee, biso pe, na bosolo mpenza, Yesu azali elongo na biso. Tokoki kosala bongo te. Tosengeli kozala na bokutani na Ye mikolo nyonso pe miniti nyonso. Oh, nasepeli na yango.

⁶⁹ Nalingi oyo Nzambe azali sikawa. Oyo baboti na ngai bazalaki na yango, oyo ba-nkoko na ngai bazalaki na yango, ezali malamumu mingi, kasi (Oyo bango bazalaki na yango ezali malamumu.) Nakanisi ete biso tokómi mosika koleka na nzela.

⁷⁰ Tótala eloko nini Azali lelo. Naboi kobwaka miso na sima mpo na kotálá likambo nini M. Moody asalaki, mpo tokómi mosika na nzela koleka M. Moody. Mabe na mangomba na biso ezali ete totálaka na sima pe tolobaka: “Ee, tótala likambo nini M. John Wesley alobaki, likambo nini bamosusu na bango balobaki.” Yango wana zebi ekómi mosika na makambo na yango, koleka basambeli, na makambo na bango.

⁷¹ Awa, eleki mibu nkama misato, moto-na-zebi moko ya France, moto ya zebi, atalisaki polele ete soki okimi mbangu mingi na kilometre ntuku mitano na ndambo na ngonga moko, okopumbwa likolo kotika mabelé na nsé. Bokanisi ete bato-na-zebi bakoki lisusu kolobela yango lelo? Bakómi kokima mbangu kilometre nkóto misato na ngonga moko pe bazali kokoba kokende. Bazali kokoba kokende liboso, kotála liboso. Kasi biso tolingaka kotála na sima mpo na kotála makambo nini Moody alobaki; Sankey alobaki; Finney alobaki; Knox, Calvin; bamosusu na baoyo wana. Makambo bango balobaki ezalaki mabe te. Ezalaki mpo na eleko na bango, kasi biso tozali kokende liboso.

⁷² Nkoko na ngai azalaki kotambola na likálo ya ngómbe. Ngai nazali kokumba motuka Ford V8. Mwana na ngai akokumba mpépo ya mbangu mingi. Ezali ete, tozali kokende liboso. Basambeli basengelaki kozala bongo. Boyei na Nkolo ekómi pene. Lingomba esengelaki kokende liboso, na nguya na yango sikawa. Zebi ekoki komata kino na mosanda moko boye, na sima, esengeli kokweya, kasi biso tozali na maziba oyo basaleli naino te, oyo basímbá naino te, ya nguya na Nzambe, oyo ezángá ndelo, oyo tosengeli komikotisa na kati. Tozali kobika na ba-milio mosika, na nse ya litómbe na biso na mpokwa ya lelo, matómbe Baklisto basengelaki kobikela. Namiyokaka nsoni mpenza, ntango natalaka awa pe namonaka ba-ndako ya bato ya mabóma, ná bokono, pe mitungisi oyo ezali kosalema sikawa. Lingomba na biso esengelaki kotambola na balabala, kobikisa babeli, kosekwisa bakufi, kobengana milimo mabe, kosala bilembo pe bikamwa, kosala ete mokili mobimba éyeba ete Yesu Klisto azali na bomoi. Yango nde tosengeli kosala sikawa.

⁷³ Ee, bokoloba: “M. Moody asalaki ata moke te. . .” M. Moody abikaki na eleko oyo te. Ezali solo. Tozali kobika na ntango ya boyei na Nkolo. Kasi tozuaki yango likambo ya bosolo ete Azalaki elongo na bandeko na biso. Kasi mokolo mosusu, ntango motemeli moko atelemelaki M. Graham, tososolaki ete Azalaki elongo na bandeko na biso te.

74 Bakutaki Ye wapi? Esika nini—esika nini bakutaki Yesu? Bobele esika batikaki Ye. Batikaki Ye wapi? Na ntèkè ya Pantekote. Totikaka Yesu wapi, lingomba etikaki Ye wapi? Na ntèkè ya Pantekote. Ntango tokei mosika na nguya ya Pantekote ya lolenge ya kala pe ntèkè ya Pantekote, tokei mosika na Yesu. Ezali mpenza bongo, moninga. Tozali kobika na nsé ya matómba na biso. Iyo, misie.

75 Batikaki Ye na ntèkè ya Pantekote, pe kuna nde esika moko oyo ba-Methodiste, Batiste, Presbiterien ná ba-Pantekotiste bakokuta Ye, ezali likambo ya kozóngá esika botikaki Ye. Esengo ya Nkolo ezali wapi? Nguya ya Nkolo ezali wapi? Lingomba ezali kotuna lelo: “Likambo nini—likambo nini ekómeli Nzambe ya masolo ya kala?” Azali kozela ete bato na Ye bábenga Ye na mosala. Kasi. . .

76 Tokoki kosala yango na nzela ya bibongiseli te. Tokoki kosala yango na psychologie te. Tokoki kosala yango na arithmétique te, to tokoki kosala yango na mayele ya kelasi te. Tozali komikabola, komikabwana. Tokabwani te. Tozali mpenza moto moko kati na Klisto Yesu. Bisó nyonso tozali moko kati na Klisto, kasi bibongiseli na biso ekosala yango ata moke te. Ata bazali malamu ndenge nini, bakosala yango te. Mayele na biso ya kelasi ezali epekiselo monene koleka, oyo Nsango-malamu ekútáná na yango, mayele ya kelasi.

77 Eloko tosengeli na yango ezali mayele ya kelasi te. Tosengeli na nguya pe kotalisama ya Molimo Mosantu, kozonga na lingomba mpo na kotalisa nguya. Yesu alobaki ata moke te: “Bókende na mokili mobimba pe—pe bólakisa.” Alobaki ata moke te: “Bókende na mokili mobimba pe bósala. . .” Alobaki: “Bókende na mokili mobimba pe bótéya Nsango-malamu.” Pe Nsango-malamu ezali kotalisa nguya ya Molimo Mosantu, lisekwa. Tozali naino na ba-milio na kilometele mosika, na esika tosengelaki kozala. Tókoba kokende liboso. Tózonga na esika oyo totikaki Ye, na feti ya Pantekote.

78 Yesu alobaki, na Yoane, nabanzi na mokapo ya 15, Alobaki: “Ngai nazali Mobimbi; bino bozali bitápe.” Ee sikawa, soki Mobimbi yango ebimisaki étápe ya liboso, pe étápe yango ekomáki Buku ya Misálá, étápe ya mibale ekokoma Buku mosusu ya Misálá. Étápe ya misato ekobóta Buku mosusu ya Misálá. Pe étápe nyonso oyo ekobima na Mobimbi wana ekozala ndenge étápe ya liboso ezalaki.

79 Sikawa, bokoki kobamba étápe, toyebi yango. Nasilá komóná nzete ya ndímo ná pene na lolenge mwambe ekeseni ya mbuma. Nasilá komóná nzete ya malálá kobimisa ba-pampleousse, ba-citron, pe mbuma ndenge na ndenge, kasi babambáki yango kobamba.

80 Yango nde likambo esalamaka lelo. Tosili kobamba makanisi na biso, kobamba bibongiseli na biso, kasi soki nzete yango

moko, ebimisi mbuma ya mobimbi mosusu, ekozala lokola oyo ya ebandeli, oyo elónamaki. Aleluya! Oh, mangomba ekosangana, kasi tosengeli na nguya ya ebandeli. Tosengeli na Molimo Mosantu, nguya ya lisekwa ya Yesu Klisto. Yango nde likambo Ayebisaki biso ete tósala.

⁸¹ “Ngai nazali Mobimbi, bino bozali bitápe.” Soki mobimbi ya nzete ya vinyo ebimisi etápe, pe eboti ba-mbuma ya vinyo kitoko ya bulé, mobimbi ya sima, oyo ekobima, ekobota pe ba-mbuma ya vinyo kitoko ya bulé. Soki Mobimbi ya liboso oyo ebimaki, bato basimbámáki na nguya ya Molimo Mosantu, pe basáláki bikamwa pe bilembo ya minene, pe batiaki elembo na litatoli na bango na mokili. . . Ata mingi na bango, ná litatoli na bango moko, bango, batiaki elembo ya litatoli na bango, na makila na bango. Balekaki na makámá pe makambo ndenge na ndenge mpo na koteya Nsango-malamu. Banyók kwamaki; babétamaki; bazuáki bitumbu. “Biso tokokende nde na Lóla na mbéto ya felele na bopètè, ntango oyo bamosusu babundáki mpo na kozua mbano, pe bananáki na mbu ya makila?” Eloko nini esengeli na biso kosala? “Nasengeli kobunda soki nasengeli kokonza. Bakisela ngai mpiko, Nkolo.” Ya solo mpenza. Tosengeli na . . .

⁸² Tozali na ntina ya ebongiseli ya sika te. Tozali na ntina ya kotonga lingomba ya sika te. Eloko tosengeli na yango lelo ezali kozonga na kolamuka ya Pantekote ya kala, oyo ebomaka masumu, pe efungolaka nzela ya lola, yango nde ebandáki na Pantekote pe ezóngi na lingomba, nguya ya Molimo Mosantu lisusu, mpo na kokótisa Yesu na mosala.

⁸³ Nzambe ya masolo, ntango nyonso, akotaka na mosala na ntango ya mpasi. Tosengeli na yango. Yango nde likambo ya mangomba na biso lelo. Tozali kozonga sima mingi koleka. Tozali kokweya na mimesano ya mokili. Moke-moke, mobu na mobu, ebandi kokufa moke-moke pe kolímwa.

⁸⁴ Ntango ya kokáta bitápe ya nzete ekómi pene. Nzambe akokáta yango, na ntembe te, ndenge natelemi na eteyelo oyo. Nzambe akokáta yango mpo na kobimisa mbuma na yango. Akolongola misálá na yango ya mokili moko na mikolo oyo. Ezali mpenza nsoni, lolenge lingomba ezali kosala makambo, na nkombo ya basambeli.

⁸⁵ Pe tomoni, ntango Yesu abimaki, liwa ekotaki. Ntango Yesu atiki losambo na biso, nguya ya Molimo Mosantu ekotika losambo na biso, ekobanda kokita pe—pe ekokufa. Pe sima na ntango moke, ekozala lisusu ata na eloko moko te. Sikawa, ntango Yesu abimaki, liwa ekotaki. Oh, ekómaki mpenza ntango moko ya mawa.

⁸⁶ Pe bótala, bamitunaki mituna, pe babengisaki Yesu, kasi Ayaki te. Babengisaki Ye lisusu, pe Ayaki te, kasi Ayebaki likambo nini Akosala. Na mpokwa oyo, Ayebi likambo nini Akosala. Epai na Ye, makambo ebebi te: Ayebi mpenza likambo

nini Alingi kosala. Akotelemisa libota moko, na bosolo mpenza, ndenge natelemi na eteyelo oyo. Akotelemisa libota moko mpo na Nkombo na Ye, kati na ekeke ya bato na Mabota. Akosala yango.

⁸⁷ Eleko ya Bayuda ekómi pene sikawa, pe oyo ya Mabota ebandi kokóma na suka, mpo bazali kokóba kobima na nzela. Bazali koboya Klisto; bazali koboya bilembo na bango; bazali koboya nyonso oyo ebengami bosantu, pe bazali kobenga yango makambo na solóka to nguya ya milimo mabe pe kosala... Bazali kotuka Molimo Mosantu pe komitia elembo mosika na Nzambe. Pe Nzambe akozua etónge moke wana, sima na ntango moke, pe akokómisa yango Lingomba ya nguya, na sima, Akotinda Molimo na Bayuda, pe Akomema Lingomba ya Mabota na ndako. Ya solo mpenza. Azali kosalema sikawa. Oh, boye, tokómi mpenza pene ya ntango na suka.

⁸⁸ Yesu, Ayebaki. Pe sima na ntango moke, Alobaki: “Moninga na biso, Lazálo, alali mpongi.”

⁸⁹ Ee, bayekoli bakanisaki ete alingaki kopema mwa moke. Balobaki: “Ee, soki alali mpongi, akoyoka malamú.”

⁹⁰ Ee, Alobaki na ndenge na Ye... na elobeli na bango, mpo básosola, Alobaki: “Asili kokufa, pe mpo na bino, Nasepeli ete Nazalaki kuna te.” Bomoni? “Mpo na bino, Nasepeli ete Nazalaki kuna te.” Mpamba te, balingaki kosenga Ye mpo—mpo na kobikisa—kobikisa ye, kasi Ayebaki ete Akokaki kosala yango te, mpo emononeli ezalaki naino... sima na mikolo minei wana, Ayebaki ete ezalaki ntango oyo Tata ayebisaki Ye. Ezali mpenza kitoko; kuna na nkunda, Alobaki: “Tata, Natondi Yo, Osili koyoka, kasi Nazali koloba yango mpo na baoyo bazali awa.” Bomoni? Asilaki koyeba likambo nini Akosala. Alobaki: “Nakokende kolamusa ye.”

⁹¹ Sikawa, nakoki kokanisa ndenge mwa libota yango ezokisamaki mpenza na motema. Likonzi ya ndako esili kokende, mawa. Oh, ezali mpenza malamú ntango ozali na ndako ya mawa to motema ya mawa, na sima, Yesu ayei mbala moko, boye te? Nakoki kokanisa komona Malata, elenge mwasi kitoko ná ezipelo ya moindo na elongi na ye, pe léki na ye Maria, ná bamosusu, basimbani, bazali koloba: “Tokosala nini? Papa ná mama bakendé, pe ndeko molingami na biso ya mobali... Sikawa, tosilá kobima na lingomba, basilá kobengana biso na losambo, pe tobimá mpo na kolanda Yesu ya Nazaléte. Akei na Ye pe atiki biso, esika moko boye.”

⁹² Nakoki koyoka moto na kotónge moko koya pe koloba: “Hé, wapi Mobikisi—nzoto ya bo-Nzambe wana, Mosakoli yango ya Galilai? Azali wapi sikawa? Bomoni, wana ntango ya kosala mpenza likambo ekoki, Akimi.” Ezali mpenza yango. Bomoni, Nzambe alingaka mpenza kosala bongo, kotika bato, bobele, kotika bato kolakisa eloko nini bazali, iyo, komeka bango mpo na komona eloko nini bazali mpenza. Apesaka bango

lipamboli. Amimonisaka, Amilakisaka, Amitalisaka na bato, mpo na komona lolenge nini bakosala, mpo na komona likambo nini bakosala mpo na yango.

⁹³ Sikawa, tomoni lisusu, sima na—na mwa mikolo, mikolo minei sima Lazálo kokufa. Bakundaki ye. Mokolo ya mibale, mokolo ya misato, mokolo ya minei. . . Sikawa, moto nyonso ayebi ete kopola ebandaka sima na mikolo misato: zólo nde ezindaka liboso na elongi. Boye nde kopola ebandaka; nkusú ya loposo ebandaka kolia nzoto. Bakundaki ye na mabelé, batiaki libanga monene likolo ya libulu oyo batiaki ye. Pe mbala na mbala, bilenge basi bazalaki kokende kofukama pembeni na nkunda mpo na kolela.

⁹⁴ Pe sima na ntango moke, nsango epanzánaki: “Yesu ayei. Tomoni Ye kokota na engumba.” Oh, elenge Malata wana, oyo azalaki mpenza, na komona na miso, na bolembu mpenza mpo na likambo yango, atalisaki na ntango wana eloko nini ezalaki kati na ye. Ye wana na nzela. Azali sikawa koya na nzela, abimaki mpo na kotala na miso. Nakoki koyoka bato mosusu na nzela koloba: “Ee, nabanzi ete bosepeli mpenza sikawa, ete losambo na bino ezali ya lokuta.” Atalaki ata bango te pe akendeki liboso, akobaki koleka pembeni na batóngi nyonso. Atambolaki kino amonaki Ye, ntango mosusu, afandaki na litumu ya balabala.

⁹⁵ Sikawa, na komona na miso, asengelaki. . . akokaki kozala na ndingisa ya kopamela Ye pe—pe ya kolobela Ye mabe. Ee, akendeki mbangu te mpo na koloba: “Tálá awa, tálá awa, Yo. Osengelaki kozala Mosakoli, Moto na Nzambe. Mpo na nini Oyaki te ntango tobengaki Yo? Ee, sikawa engumba mobimba ekómi kotiola biso. Tobimaki na lingomba na biso mpo na kolanda Yo.” Emonanaki lokola azalaki na ndingisa yango. Kasi boyebi, ezali ndenge nateyaki likolo na *Mwana-mpate Ná Ebenga*, soki tozali mwana-mpate, mwana-mpate andimaka kozánga makoki nyonso azali na yango. Ezali ya solo mpenza. Azalaka bobele na nkunza, na bongo asengelaka kondima kozanga yango. Yo pe ndima kozanga makoki nyonso oyo ozali na yango mpo na kosalela Nzambe. Ezali mpenza ya solo.

⁹⁶ Nazalaki kolobela basi, na ntina na lolenge bazalaki kolata bilamba mike mike wana, boyebi, pe balobaki: “Ee, tozali—tozali bana-mboka Amerika. Tokoki kosala makambo tolingi.”

⁹⁷ Nalobaki: “Ezali solo mpenza, kasi soki ozali mwana-mpate, okondima kobungisa makoki na yo.” Komela makaya pe kosala makambo ya ndenge wana, yango nde likambo mabe koleka oyo mwasi akoki kosala. Ezali solo mpenza.

⁹⁸ Mwasi moko alobaki na ngai, kala mingi te, azalaki kosolola na ngai, alobaki: “Kasi, Ndeko Branham, bazali kosona bilamba ya lolenge mosusu te.”

⁹⁹ Nalobaki: “Kasi bazali naino kosala masini-ya-kosona bilamba pe kotéka biloko. Okoki komilongisa ata moke te mpo na yango.” Ezali solo mpenza.

¹⁰⁰ Bómikanisela, mokolo moko, okoki kozala péto awa mpo na mobali na yo, kasi okosámba mpo na ekóbo mpo na yango, na ntembe ata moke te: “Moto nyonso oyo akotála mwasi mpo na kolula ye, asili kosala na ye ekobo na motema.”

¹⁰¹ Likambo nini ekómeli basi ya ba-Pantekotiste lelo, yango nde likambo nazali komituna. Ndenge bopengwi mosika na molongo ya kala. Ndenge ba-mama na bino bazaláká na suki milai, kasi lelo, basi ya ba-Pantekotiste bakómi kopakola-pakola lokola bato na Ntèkè Liboso ya kokila-ya-pásika, pe bakómi kokáta suki na bango, pe kolata mwa bilamba ya mikuse ndenge wana, lokola bamosusu basalaka . . . kobima libándá mpo na kokata matiti na sima ya nzanga, ntango mibali bazali koleka na nzela, ozali kososola, yo mwasi, ete okosámba mpo ozali kosala ekóbo ná mibali yango? Yo moto omitalisi liboso na bango mpo na ntina wana. Ezali molimo mabe likolo na lingomba pe na bato, kasi bayebi yango te. Bakufi miso pe bayebi yango te. Ezali solo.

¹⁰² Ntango mosusu bokoki koloba ete nazali na ndingisa ya koloba yango te lokola mopalanganisi-nsango-malamu. Ee, na—nasengeli kolanda bokambami ya Molimo Mosantu; yango nde nyonso nakoki koloba. Bino . . . Soki nakutani na bino na kosambisama, na bongo, nakozala na makila na bino na maboko na ngai te. Bókende mosika na makambo nyonso oyo ezali komonana lokola ya Satana. Bózala mosika na yango. Bókabwana na yango. Ata bozali ba-vedette ya television boni, etali ngai te. . . Bozali awa te mpo na kozala vedette ya télévigion; ozali mwana mwasi ya Nzambe.

¹⁰³ Na ntongo mosusu, natéyaki na losambo ya mokengeli moko, likolo na mobange moómbo moko, ntango bazaláká koteka baómbo, eleki ntango molai. Pe bazalaki koya kosomba bango na moto oyo akopesa mbongo mingi. Pe bato bazalaki kuna, bazalaki kolela, kogánga, mpo na mboka na bango; bakozónga lisusu kuna te. Pe basengelaki kobéta bango fimbo. Pe bazalaki kosómbo bango lokola basómbaka motuka, na eloko nyonso, na ntalo ndenge na ndenge, pe bazalaki kotéka bato yango.

¹⁰⁴ Pe mokolo moko, mosómbo moko ayaki, mosómbo-baómbo, na fonda- . . . na elanga moko monene, nde. Pe alobaki: “Bozali na baómbo boni ya koteka?”

¹⁰⁵ Alobaki: “Ee, nazali na baoyo ya kosombitinia.” Bazalaki koluka koyeisa bango minene. Kozua ba-mama wana, ba-tata. . . Soki mwasi ye asilaki kobala azalaki mwasi ya mwa nzoto moke, bakozua mibali oyo ya mbinga pe nzoto kólóngónó mpo na kosangisa bango na . . . lokola ba-mpunda ná banyama. Ezalaki malamau ata moke te. Nzambe asalaki moto. Moto asalaki baómbo. Ezali malamau te longwa ebandeli, ata moke te. Ezali ata

moke te mposa na Nzambe ete moto ázala moómbo. Te, misie. Pe te. . . Bótala likambo nini esalemaki.

¹⁰⁶ Bongo, kati na makambo nyonso wana, moto yango alobaki: “Ee, nalingi kosomba bamosusu na bango. . .” Amonaki elenge mobali moko kuna. Bazalaki na ntina ya kobéta ye fimbo te. Atómbolaki mbanga, motó na ye, lokola moto ya lokumu mpenza, azalaki kotambola zinga-zinga. Pe mosómbi-baómbo yango alobaki: “Nalingi kosómba ye.”

¹⁰⁷ Alobaki: “Kasi ye azali ya kotéka te.”

¹⁰⁸ Alobaki: “Ee, mpo na nini?” Alobaki: “Azali mokonzi?”

¹⁰⁹ Alobaki: “Te, azali moómbo.”

¹¹⁰ “Ee,” alobaki, “mpo na nini? Boleisaka ye malamú koleka bamosusu?”

¹¹¹ Alobaki: “Te. Aliaka kuna na makusa elongo na bamosusu. Azali moómbo.”

¹¹² Alobaki: “Eloko nini ezali kokesenisa ye mingi boye na bamosusu?”

¹¹³ Pe motekisi-mokonzi yango alobaki: “Ngai moko pe namitunaki motuna yango ntango molai, kasi mokolo moko nasósólaki. Kuna na ekólo na bango, tata na ye azali mokonzi ya mboka. Pe ata azali mopaya, mosika na mboka yango, abosani te ete azali mwana ya mokonzi, pe azali komikamba se bongo.” Soki yango. . . Soki mwana-mboka ya Afrika akoki kosósóla ete tata na ye azali mokonzi, pe awa, mopaya, na mboka mopaya, akoki kobosana te ete kuna, na ngámbo ya mai-na-mbu, azali mwana ya mokonzi, ndenge nini basi ná mibali basengeli komikamba, ntango oyo bozali bana-mibali pe bana-basi ya Nzambe? Bóbika bobele bongo. Ya solo mpenza. Bómikamba malamú; bómipetola pe bóbika lokola bana-mibali pe bana-basi ya Nzambe. Kokamwa te, ezali lolenge ya bongo.

¹¹⁴ Tokómi wana. Oh, elenge Malátá, ayaki na lombángu. Azalaki komonana lokola azalaki na—na nzela ya koloba likambo moko mpo na kotelemela Ye. “Mpo na nini Oyaki kotálá ndeko na ngai te? Tala makambo tosilá kosálá mpo na Yo, kasi Obwakisi biso.” Ee, soki álobaka bongo, lisolo yango elingaki kosuka ata moke te ndenge esukaki te. Te, misie. Ezali likambo ya lolenge ozali kobeleva liboso na likabo ya Nzambe, oyo ya Nzambe. Soki Nzambe atindi likabo, osengeli kobeleva liboso na yango na lolenge esengeli. Soki olingi mpenza kozua eloko moko na yango, osengeli kobeleva na yango na lolenge esengeli. Pe Malátá ayebaki yango. Ntango mosusu atángáká lisolo ya mwasi Mosuneme ná bebé na ye. Pe ye. . . Soki mwasi Mosuneme wana ayebaki ete Nzambe azalaki kati na Eliya, koleka mingi boni Azalaki kati na Yesu? Na ntembe te.

¹¹⁵ Na bongo, abélémaki na lolenge esengeli. Akendeki na lombángu pe akweyaki na nse ya makolo na Ye. Nasepelaka na

yango! Akweyaki na nse ya makolo na Ye pe alobaki: “Nkolo . . .” Wana nde ebianganeli na Ye mpenza. Yango nde oyo Ye azalaki. Azalaki Nkolo na ye. “Nkolo, soki Ozalaki awa, ndeko na ngai alingaki kokufa te.”

116 Oh, la la! Oh, nakoki kokanisa komona motema monene na Ye, ntango Atalaki mwasi kitoko wana, mpisoli kotanga na matáma na ye. Alobaki: “Nkolo, soki Ozalaki awa, ndeko na ngai alingaki kokufa te.” Bótala likambo nini alobaki. “Kasi ata sikawa, Nkolo, ata asili kokufa, ata nkusú ya loposo ezali kotambola na nzoto na ye, ata sikawa, Nkolo, likambo nyonso Okosenga na Nzambe, Nzambe akopesa Yo yango.”

117 Oh, yango nde sekélé. Okoki koloba: “Nasili kotambola na ba-lopitalo nyonso. Monganga alobi ete nakokufa, kasi ata sikawa, Nkolo . . . Nakómi mpenza ebósono mpo na mingai; nakoki koningana te, kasi ata sikawa, Nkolo . . .”

118 Bébé moke wana azalaki na bokono ya mai-na-motó, motó na ye ekómaki monene *boye* lobi na mpokwa. Eloko moko okoki kosala ezali te. Elingaki kokóba koya monene kino kopanza mwa motó na ye pe ákufi: “Kasi ata sikawa, Nkolo . . .” Azali bobele Nzambe yango moko. Azali bobele Nkolo yango moko. “Ata sikawa, Nkolo . . .” Pe Afandi na loboko ya mobali ya Nzambe na nguya-Nyonso, mpo na kolobela makambo oyo biso totátolaka ete Asilá kosálá mpo na biso.

119 Sikawa, nakómi komiyoka mpenza mosambeli. Ya solo mpenza. Bokobenga ngai motútuki ata bongo, boye ekozala malamu ete bóbanda, pe bósilisa na yango.

120 Na bongo, iyo, misie: “Ata sikawa, Nkolo, eloko nyonso Okosenga na Nzambe, Nzambe akosala yango.”

121 “Bósenga eloko nyonso na Tata na Nkombo na Ngai, Nakosala yango,” Yesu alobaki yango.

122 “Ata sikawa, Nkolo, eloko nyonso Okosenga, Nzambe akopesa Yo yango.” Oh, likambo yango ekótaki mpenza na bozindo ya motema monene na Ye.

123 Alobaki: “Ndeko na yo akosekwa.”

124 Alobaki: “Iyo, Nkolo. Akosekwa. Azalaki mwana malamu. Akosekwa na lisekwa ya bato nyonso na mokolo ya suka.” Bayuda yango bazalaki kondima lisekwa ya bato nyonso. “Akosekwa na lisekwa ya mikolo ya suka.”

125 Bótala Ye. Amisémbolaki nzoto. Alobaki: “Nazali Lisekwa pe Bomoi.” Oh, la la! Ata moto moko te akokaki koloba likambo yango liboso. Ata moto moko te na sima, akoki koloba yango. Bobele Ye moko nde Akoki koloba yango. “Nazali Lisekwa pe Bomoi,” Nkolo alobi. “Ye oyo akondimela Ngai, ata akufi, akozonga na bomoi. Pe moto nyonso oyo azali na bomoi pe andimeli Ngai akokufa ata moke te. Yo ondimi yango?”

126 Alobaki: “Iyo, Nkolo.” Oh, ayebaki ete likambo moko elingaki kosalema. Esengeli kosalema.

127 Ntango kondima euti na motema ya sembo ekutani na Nzambe, biteni ya esalelo-mosala ekosangana *boye*. Likambo moko esengeli kosalema. Nabeti móndengé liboso na eyanganelo oyo na mpokwa oyo, na Nkombo na Yesu Klisto, tika ete kondima na bino ésangana na Nzambe ndenge wana, sima na miníti moke, tokozala na Pantekote mosusu. Ekozala na kolamuka moko monene na engumba oyo, kino ba-policier ya ekólo oyo bakozala moke mpo na kofandisa bango kimia. Ezali solo. Ekozala kolamuka ya solosolo. “Ata sikawa, Nkolo . . .”

128 “Ee, Nkolo, tosili kokangama na likambo oyo; tosalaki likambo boye pe tosalaki oyo kuna.” Likambo bosalaki etali ngai te: “Ata sikawa, Nkolo . . .” Azali kozela bino ete bóbelela Ye. Ye . . . “Yo ondimi yango?” Na ntembe te. Iyo, misie. Ata sikawa, eloko nyonso bokosenga Ye . . .

129 “Botii ye wapi?” Sikawa, Akei na nkunda. Azalaki mpenza moto mpo Alelaki; Azalaki mpenza Nzambe mpo Asekwisaki mokufi.

130 Awa, kala mingi te, mwasi moko oyo azalaki moto ya etónga moko boye . . . Nakómisaka yango momesano ata moke te, kosala yango, na ntina na bibongiseli. Kasi mwasi oyo . . . Bango bandimaka te ete Yesu azalaki Nzambe. Balobaka ete Azalaki bobele mosakoli. Sikawa, Azalaki . . . Soki Azalaki bobele mosakoli, biso nyonso tozali kati na lisumu. To Azalaki Nzambe, eloko mosusu te na nse ya Nzambe, to azalaki mopengwisi monene koleka koleka nyonso oyo mokili esílá kozua. Ezali solo. Azalaki koleka mpenza moto. Ye alobaki: “Azalaki Nzambe te.”

131 Makambo ya ndenge wana etondi na nsango-malamu ya bomengo lelo; bazali koluka kokómisa Yesu Klisto mosakoli. Ee, Azalaki Nzambe ya basakoli. Azalaki mpenza yango.

132 Alobaki: “Nakotalisa yo yango polele na Biblia na yo: ‘Azalaki bobele moto.’”

133 Nalobaki: “Sálá yango.”

134 Pe alobaki: “Ntango Akendeki na nkunda ya Lazálo, Biblia elobi: ‘Alelaki.’ Asengelaki kozala moto akufaka, to, Akokaki kolela te.”

135 Nalobaki: “Madame, yango nde Likomi na yo?” Naboi kozala moto ya kozánga limemia awa mpo na koloba likambo oyo, kasi nakoyebisa bino likambo nayebisaki ye.

136 Alobaki: “Ezali yango.”

137 Nalobaki: “Maloba yango ezangi mpenza makasi lokola súpu ya élíí ya soso ekufi na nzala.” Nalobaki: “Ee, o—ozali ata na eloko moko te mpo na kotelema likolo na yango.”

138 Alobaki: “Ee, Alelaki. Etalisaki ete Azalaki moto-akufaka.”

139 Nalobaki: “Azalaki mbala moko moto-akufaka pe moto-akufaka-te. Azalaki Nzambe kati na nzoto.”

140 Alobaki: “Oh, boléma.”

141 Nalobaki: “Azalaki kolela ntango Akendeki na nkunda. Ezali mpenza solo, kasi ntango Amisémbolaki nzoto mwa moke. . .” Biblia elobi: “Azalaki mpenza na eloko ya kobenda bokebi likolo na Ye te; Azalaki na kitoko te ete tótala epai na Ye.” Kasi ntango Azongisaki mwa mapeka yango sima pe alobaki: “Lazálo, bimá,” pe moto oyo asilaki kokufa eleki mikolo minei, pe asilaki kopola kati na nkunda, abimaki. Wana ezalaki koleka ata moto. Bólakisa ngai moto oyo akoki kosala yango. Ezalaki nini? Kopola eyebaki Nkolo na yango. Bomoï eyebaki Mokeli na yango. Likambo moko esengelaki kosalema. Alobaki, pe moto oyo asilaki kokufa pe azalaki kati na nkunda mikolo minei, asekwaki, atelemaki, pe azongaki na bomoï. Aleluya! Oyo wana ezalaki Nzambe kati na Mwana na Ye. Iyo, misie. Oyo wana ezalaki Nzambe komitalisa Ye moko na nzela na Ye, Mwana. Oyo wana ezalaki Nzambe koloba, moto te.

142 Azalaki moto, ntango Alukaki eloko ya kolia na nzete wana, mokolo wana. Oyo wana ezalaki moto. Kasi ntango Azuaki biteni ya mápa mitano ná mbisi mibale pe Aleisaki bato nkóto mitano, oyo wana ezalaki koleka ata moto. Oyo wana ezalaki Nzambe koleisa bango kuna. Azalaki koleka ata mosakoli, koleka moto, Azalaki Moto-Nzambe. Na ntembe te.

143 Alalaki na sima ya mwa masuwa yango na butu wana, pe mai-na-mbu ezalaki konguluma pe bazalaki kotepa-tepa lokola litukú ya molangi kati na mai-na-mbu makasi wana, ntango oyo milimo mabe nkóto zomi ya mai-na-mbu ekánaki kozindisa Ye na mai na butu wana. Azalaki moto, na botaú pe kolemba sima na kobondela mpo na babéli, alalaki kuna na sima; pe mopepe ezalaki ata kotungisa Ye te. Azalaki moto ntango Aláláki mpongi, kasi ntango Alamukaki, atiaki lokolo na libaya ya masuwa, Atombolaki miso, pe alobaki: “Kimia, bófanda nye,” pe mipepe ná ba-mbóngé etósaki Ye, oyo wana ezalaki koleka ata moto. Oyo wana ezalaki Nzambe kati na moto, komitalisa Ye moko. Ezali solo.

144 Azalaki moto, na ekulusu, ntango Agángaki mpo na kosenga mawa. Ntango Agángaki pe alobaki: “Nayoki mposa ya mai,” oyo wana ezalaki moto. Ntango Akufaki, Azalaki moto, kasi na ntongo ya Pásika, ntango Abukaki bilembo ya liwa, ewélo, ná nkunda, pe Asékwaki, Azalaki koleka ata moto: Ezalaki Nzambe oyo atalisami polele. Kokamwa te ete moyembi alobaki:

Na bomoï, Alingaki ngai; na liwa, Abikisaki ngai;
Na bokundami, Amemaki masumu na ngai mosika;

Na lisekwa, Alongisaki ngai ofelé mpo na libela;
Mokolo moko Akozonga—O mokolo ya nkembo!

145 Alobaki: “Mpo Ngai nazali na bomoi, bino pe bokozala na bomoi. Yo ondimi yango?” Azali motindo moko lobi, lelo pe libela. Yo ondimi yango? Ngai nandimi ete Molimo Mosantu azali awa sikawa. Yo ondimi yango? Ngai nandimi ete Akotondisa biso na Bozali na Ye. Yo ondimi yango? Ngai nandimi ete Molimo Mosantu alingi kosopa Bozali na Ye, kobikisa babéli nyonso, kotondisa bato nyonso bazangi Molimo Mosantu. Yo ondimi yango? Ondimi na motema na yo mobimba? Tótelema pe tópesa Ye masanzoli. Nandimi ete Akokita sikawa likolo na biso.

146 E Nkolo Nzambe, Mokeli ya likoló ná nsé, Nkolo ya Bomoi na Seko, Mopesi ya makabo malamunyo nyonso, biso “Yo ondimi yango,” Nkolo. Tondimi ete Yo ozali awa na liyangani. Tondimi ete Yo moto ozali kopambola bomoto na biso ya kati. Tondimi ete Yo moto ozali kosopa Molimo na Yo likolo na biso. Tondimi ete Ozali motindo moko lobi, lelo pe libela. Tondimi ete Ozali na bomoi bileko na bileko pe ba-nkombo na biso ekomami na Buku na Bomoi ya Mwana-mpate. Likoló nyonso ná nsé ekoleka, kasi biso tokozala na bomoi mpo na libela, mpo Yo ozali na bomoi mpo na libela. Nkolo, Yo olakaki biso yango. Tondimi yango na motema na biso mobimba. Na nyonso oyo ezali kati na biso, tondimi yango, Nkolo. Nalingi Ye, nalingi Ye.

147 Bondimi Ye? Ngai nandimi ete ezali Molimo Mosantu. Eloko moko ezali kokita likolo na biso. Yo ondimi yango? Ngai nandimi ete Alingi kobikisa moto nyonso sikawa. Yo ondimi yango? Bótombola maboko epai na Ye. Bótelema. Yo ondimi yango? Molimo Mosantu azali awa. Oyo ezali Yango! Petelo alobaki: “Oyo ezali Yango.” Oyo ezali Yango, Molimo Mosantu.

148 E Nkolo, Mokeli ya likoló ná nsé, tinda nguya na Yo, pe mapámboli na Yo, pe bolamu na Yo likolo na bato oyo, pe pámbola mitema na bango, pe tika ete bámona ete Mwana na moto azali na bomoi bileko na bileko. Sálá yango, E Nkolo. Tobonzi bango epai Yo, na Nkombo na Yesu Klisto, Mwana na Nzambe.

149 Moto nyonso oyo azali na Molimo Mosantu te, tómbola mabóko pe sánzola Nzambe. Nandimi ete Akokita likolo na bino. Moto moko átiela bango maboko. Ngonga yango oyo. Mpo na nini tózela ntango molai? Ntango yango oyo. Ntango ya Pantekote yango oyo, ya kozóngela Nzambe. Bózonga na boyokani ná Nzambe, Pantekote! Tika ete nguya ya Nzambe na bomoi épesa mpiko na mitema na bino. Tika ete Molimo na Ye éya kokóta kati na bino, étondisa bomoto na bino ya kati. Azali awa mpokwa na mpokwa, awa mpo na kobikisa babéli, kofungola miso ya bakufi

miso, na nguya monene pe makasi, oyo Azali komitalisa ete Azali ntango nyonso motindo moko. Aleluya!

¹⁵⁰ Bósanzola Ye. Bótombola maboko. Bóbosana esika bozali; bóyeba ete bozali zonga-zonga na Ye, na bolamu na Ye, na nkembo na Ye, pe na nguya na Ye, pe mawa na Ye eumelaka libela. Azali motindo moko libela. Nkombo na Nkolo épambolama. Aleluya! Oh, Nkombo na Ye ya bule é sanzolama.

¹⁵¹ Oh, ezali kitoko mingi, Azali mpenza na nguya. Bato boni bolingi kobulisa lisusu bomoi na bino na Nzambe sikawa? Tómbóla loboko. Bato boni bolingi kobulisa bomoi na bino na Nzambe? Ezali yango. Bótombola maboko. Tómona Pantekote. Tómona bato ya Nzambe. Nakotómbola loboko na ngai. “Nkolo, ngai oyo. Tinda ngai.” Na bongo, zua Mwanje moko, ná makálá ya etumbelo pe tinda nguya na Yo likolo na biso, Nkolo. Nzambe, sálá yango na litondi ya Molimo na Yo, E Tata. Yóka libondeli na biso, E Nkolo. Yóka libondeli na biso, lokola bana bandimi oyo batelemi ngwi. Nkombo na Ye é sanzolama.

¹⁵² Oh, lokola ba-mbóngé ya nkembo ezali kokita, oh, matangá ya mamwe ya mawa. E, masánzoli na Nzambe. Tika ete bomoto na biso ya kati ézela. Yo ondimi yango? Yo ondimi yango? Oyo ezali Molimi Mosantu oyo ezali koya. Oyo ezali nguya emonanaka te oyo ekotisa biso na Bokonzi ya Nzambe, mapámboli ya Pantekote. Bózonga na ndako. Bazali kozela bino na ndako. Bozali bato ya motuya. Nzambe alingi ete bómibulisa. Basi, bómipetola. Mibali, bómipetola. Tóbanda kozongela Nzambe pe kosalela Nzambe na motema ya peto mpenza.

¹⁵³ Nzambe á sanzolama, Molimo Mosantu ezali awa kati na liyangani. Sálá bobele likambo okambami kosala. Tika bobele Molimo Mosantu é sala likolo na yo. Likambo mosusu nakoki koloba ezali te. Nayebi te likambo nini koloba sikawa. Molimo Mosantu esili kotonda na ndako mobimba. Nkombo na Nkolo épambolama. Masanzoli na Nkolo. Oh, Aleluya! Aleluya! Masanzoli na Nkolo. Masanzoli na Nkolo. Ezali kitoko mingi, nkembo mingi. . . Kitoko mingi, masanzoli ya basantu ya Nzambe na bilongi na bino ezali kitoko mingi, mpo Bozali ya Molimo Mosantu awa ezali kosala pe kolakisa biso nkembo na Ye, katikati na ebelé na bato oyo bazali na motema moko, kosanzola Nkombo na Ye.

¹⁵⁴ Bóngwana pe pésa mbóte ya loboko na moto moko, lóba: “Masánzoli na Nzambe, ndeko mobali. Masánzoli na Nzambe, ndeko mwasi.” Tókota kuna na kati pe Nzambe á pesa biso mpiko. Masánzoli na Nkolo. Ezali solo. Bino nyonso, ba-Methodiste, ba-Batiste, ba-Presbiterien, ba-Pantekotiste ná ba-Adventiste ya Mokolo ya Sambo, ata ózali nani, bópesana mbóte ya loboko Liboso na Nkolo Nzambe. Ezali yango. Oh, Aleluya! Aleluya! Aleluya! Oh, natondi na esengo, mpo nazali moko na bango.

Natondi na esengo. Oh, bitutu ezali kobukana, bosoto ezali kolongwa. Nkembo! Bonsomi kati na Nkolo, Nkombo na Ye ya bule é sanzolama. . . Nkombo na Nkolo épambolama. Oh, Aleluya! Nzambe á sanzolama.

¹⁵⁵ Oh, nalingaka mpenza komona yango: bato bazali kopesana mbóte ya loboko pe kongengisa bilongi na bango. Nguya na Nzambe ezali koloba: “Ezali yango. Ezali yango, tozali bana na Nzambe. Bisó nyonso tozali lingomba moko monene mpenza, moto moko monene mpenza kati na Klisto Yesu, Mwasi na Ye ya libala, Oyo ya nkembo.” Boyei ya Nkolo ezali kobeleva. Bato na Ye bazali kosangana pe kolingana. . . na bolingo pe na nguya ya Bozali na Ye. Oh, oyo ezali lokola Lola. Oh, oyo ezali malamú. Amen. Oh, ezali nkembo mpenza, kitoko mpenza: bobele kokumbamela Nkolo na Molimo pe na nguya. Ntango kitoko nini oyo. (Oyo wana ezalaki suka; ebandeli.)

¹⁵⁶ Ezali na eloko te. . . Nayebisaki bandeko: “Bandeko, esika ya kosukela ezali te.” Ezali na esika moko te awa oyo. . . Tozali na ebandeli te, tozali pe na suka te. Mpenza—mpenza kitoko. . . Bato boni bazali komiyoka malamú mpenza? Bobele Bozali ya Nkolo, oh! la la! ezali kitoko mingi, Bozali ya Nkolo ezali awa.

¹⁵⁷ Sikawa, Bozali ya Nkolo ezali awa mpo na kobikisa babéli, kopesa bato nzoto kólóngónó. Bóndimela bobele Ye. Bondimeli Ye? Soki tokoki kondimela Ye, nyonso ekoki kosalema. Bondimi yango? Bondimi ete ezali Bozali ya Nkolo?

¹⁵⁸ Sikawa, ntango oyo bino. . . Bópesa ngai mwa ntango moke, mwa ntango moke sikawa, pe bóyoka mwa moke. Bótika nátalisa bino polele ete Molimo Mosantu nde ezali awa. Bótika nálakisa bino ete Molimo Mosantu, Ye mpenza oyo alobaka, Ye oyo asalaka makambo, ayebaka yango. Bato boni bazali awa sikawa, oyo bayaki awa ná bokono? Bótombola maboko. Baoyo bazalaki na bokono. . . Ezali na bato. . .

¹⁵⁹ Ezali na moto moko ateleme kuna. Ondimi, misie? Bakabolaki ba-kalati ya mabondeli te, kasi ondimi ete Nzambe akoki kobikisa yo? Ondimi ete Akoki koyebisa ngai likambo na yo? Ezali na mopanzi na yo. Obélémi mpo bápasola yo. Ezali solo. Nkombo na yo M. Cartwright. Ezali solo. Ezali ya solo? Pepá loboko na yo. Malamú. Zóngá na ndako pe yóka malamú, okozala na ntina na yango te. Ondimi yango?

¹⁶⁰ Mobali oyo amemi bebé wana na maboko na ye, ondimi ete nazali mosali ya Nzambe? Ondimi ete oyo ezali Molimo Mosantu? Nayebi yo te, ezali ya solo? Namóná yo naino te na bomoi na ngai; toyebani te. Ondimi ete Molimo Mosantu akoki koyebisa ngai likambo nini ezali na bebé wana? Azali na bokono ya kintútu. Ezali solo. Ezali solo te? Na ntembe te. Ofandaka awa te. Te. Ozali na mpasi ya líkundú, ozali na bokono yango, yo moko. Ezali solo, boye te? Outi na Kansas City. Malamú. Zóngá kuna, Yesu

Klisto abikisi yo. Aleluya! Bóndima. Bondimi yango na motema na bino mobimba?

¹⁶¹ Mwanje na Nkolo Ye oyo, likolo na mwasi ya nzoto mike—nzoto mike oyo, mobange malamumu oyo, afandi awa na kati, azali na bokono ya lingúndu. Ondimi ete Nzambe akobikisa yo na lingúndu wana, ndeko mwasi? Yo, ozali na feléle ya motane na ekoti na yo, tómbola loboko. Malamumu. Zóngá na ndako pe yóka malamumu. Amen. Oh, ezali Nzambe; ezali Klisto, Mwana na Nzambe. Asékwá longwa na bakufi. Azali awa.

¹⁶² Sikawa, bótia maboko ba-moko likolo na ba-mosusu pe bóbonza ntango malamumu ya mabondeli, bino banso, wana nakosenga ete moto moko áya awa. Yáká awa, ndeko mobali. Ntango oyo bino botii maboko ba-moko likolo na ba-mosusu mpo na kotalisa ete Nzambe abikisaka pe, nazali na ndeko moko awa mpo na kobondela pe. (Bókoba. Malamumu.) Masánzoli na Nkolo Nzambe.



YO ONDIMI YANGO? LIN60-0402

(Believest Thou This?)

Liteya oyo ya Ndeko William Marrion Branham, eteyamaki liboso na Ngelesa mokolo mwa mpóso, mokolo mwa 2, sanza ya minei, na mobu 1960, na Municipal na Auditorium na Tulsa, Oklahoma, U.S.A., ekamatamaki uta na bande pe ekomamaki mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2017 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org